

Réamhrá le Tuarascáil Bhliantúil Iomaíochta 2022

le Margrethe Vestager, Leas-Uachtarán Feidhmiúcháin agus an Coimisinéir um Iomaíocht

In 2023, tá 30 bliain ann ó tháinig an Margadh Aonair ar an saol. Snaidhmeann sé ceangal níos dlúithe idir saoránaigh den Aontas agus idir gnólachtaí san Aontas, rud a fhágann go bhfuil sé ar cheann de na héachtaí is mó atá bainte amach ag an Aontas agus go bhfuil sé ar cheann de na huirlisí is fearr atá ann chun an tsíocháin a chur chun cinn, ár luachanna a chosaint agus leas an phobail seo againne a áirithiú.

Aimsir seo a chomórtha, is luaineach an saol atá ann. Tá an domhan ag athrú ó bhonn. In áit ár n-ord eacnamaíoch atá bunaithe ar riosca, tá ord eile ag teacht i réim, ceann nach bhfuil chomh cobhsaí ná chomh hintuartha céanna. Is í an ghné is measa agus is marfaí den aistriú sin ionsaí na Rúise ar an Úcráin, ach tá bealaí éagsúla ann a bhfuil na hathruithe atá ag teacht ar an ngeopholaitíocht ag imirt tionchar ar an Margadh Aonair, bíodh sin de bharr slabhraí soláthair a bheith faoi bhrú nó de bharr éifeachtaí ar thrádáil. Ní mór dúinn gníomhú chun astaíochtaí carbóin a laghdú as éadan agus chun geilleagar domhanda glan-nialasach a bhaint amach, sprioc a bhfuil glacadh leis – ar an dea-uair – lasmuigh den Aontas Eorpach anois freisin. Anuas air sin, tá an t-aistriú digiteach ann. Tá ár ngeilleagar agus ár saol dulta de léim i dtreo an spáis dhigitigh. Mar sin féin, i gcásanna áirithe, níl an spás sin chomh hoscailte agus chomh hinchoimhlinte agus ba cheart.

Tá impleachtaí móra i gceist leis na hathruithe sin ar fad, agus is athruithe iad a chruthaíonn idir rioscaí nua agus deiseanna. Tá ról suntasach ag beartas iomaíochta an Aontais ó thaobh na héifeachtaí diúltacha a bhaineann le haistrithe eacnamaíocha a mhaolú, agus na tairbhí a d'fhéadfadh a bheith ag baint leis na haistrithe céanna a uasmhéadú.

De bharr an aistrithe go geilleagar digiteach, tá deiseanna ollmhóra ann le haghaidh an fháis eacnamaíoch agus le haghaidh feabhsuithe ó thaobh na héifeachtúlachta de agus beidh feasta. Rialacha iomaíochta an Aontais a fhorfheidhmiú, sin rud a bheidh ríthábhachtach i dtaca le margaí digiteacha a choinneáil oscailte agus inchoimhlinte. Déanfar an forfheidhmiú sin i gcomhar le forfheidhmiú an Ghnímh um Margaí Digiteacha a tháinig i bhfeidhm i mí na Samhna 2022 agus a mbeidh feidhm aige ó mhí na Bealtaine 2023 ar aghaidh. Is é is aidhm dó margaí digiteacha a choinneáil inchoimhlinte agus deireadh a chur le cleachtais éagóracha a bhíonn ar bun ag cuideachtaí a fheidhmíonn mar gheatóirí le haghaidh gnólachtaí a oibríonn ar líne. Tá sé d'aidhm ag an gCoimisiún na chéad gheatóirí a ainmniú in 2023 agus a áirithiú go mbeidh na hoibleagáidí agus na toirmisc á gcomhlíonadh go hiomlán faoi 2024.

Ghlac an Coimisiún an Creat Sealadach Géarchéime um Státchabhair i mí an Mhárta 2022 - mí tar éis ionradh gan chúis na Rúise ar an Úcráin - ionas gurbh fhéidir leis na Ballstáit tacú le gnólachtaí inmharthana atá buailte go dona ag éifeachtaí an chogaidh sin. I mí an Mhárta 2023, rinneadh den Chreat sin an Creat Sealadach Géarchéime agus Aistrithe, agus is creat é sin lena gcuirtear ar chumas na mBallstát bogadh ar aghaidh ó fhreagairtí láithreacha ar úsáid an fhuinnimh mar arm agus dul i ngleic le dúshláin forleathana, rud a dhéantar trí dhlús a chur leis an aistriú glas. A bhuí le raon feidhme níos leithne an Chreata fheabhsaithe sin, is féidir leis na Ballstáit, i measc nithe eile, tacú le hinfheistíochtaí táirgiúla le haghaidh rogha teicneolaíochtaí agus amhábhar atá riachtanach le haghaidh an aistrithe sin, go háirithe i gcás ina bhfuil riosca sceite infheistíochta ann lasmuigh den Aontas Eorpach. Agus chinntíomar go raibh ár bhfreagairt ar na dúshláin sin ag teacht lenár

bprionsabail: chun sláine an Mhargaidh Aonair a chaomhnú, tá an Creat nua sin spriocdhírthe agus sealadach, agus beidh na forálacha nua maidir leis an 'aistriú' i bhfeidhm go dtí 2025.

A bhuí le glacadh an Rialacháin maidir le Fóirdheontais Eachtracha i mí na Samhna 2022, tá an tAontas Eorpach ag ceartú éagthroime - cé go bhfuilimid ag déanamh grinnschrúdú le fada ar Státchabhair a dheonaítear laistigh den Aontas Eorpach, ní sheiceáilte fóirdheontais tríú tír chuig cuideachtaí a dhéanann gnó san Aontas. Tá an tAontas Eorpach ag cur cothrom iomaíochta i réim agus, in 2023, cuirfidh an Coimisiún tús le cur chun feidhme agus forfheidhmiú an Rialacháin. Is é is aidhm don Choimisiún gur forfheidhmiú spriocdhírthe go maith a bheidh i gceist, ionas go soláthrófar soiléireacht agus tuarhacht de réir mar a fhorbrófar an cleachtas cinnteoireachta. Cosnóidh sé sin an Margadh Aonair sa tslí go leanfaidh sé de bheith oscailte; ionas gur margadh é ina mbíonn na gnólachtaí uile san iomaíocht ar théarmaí cothroma comhionanna, is cuma cad as dóibh.

D'ainneoin na n-imeachtaí claochlaitheacha agus na dtionscnamh claochlaitheach sin, níor tháinig maolú ar an ngnáth-fhorfheidhmiú i dtaca leis iomaíocht, agus is amhlaidh gur leanadh de i ngach réimse. I réimse an dlí in aghaidh trastaí, ghlac an Coimisiún cinntí in dhá chás cairtéil i margadh na pacáistíochta miotail agus i margadh na monaiméire stíréine. Gníomhaigh an Coimisiún sa réimse dhigiteach freisin, mar na gealltanais arna dtairiscint ag Amazon, rinne an Coimisiún ceangailteach ó thaobh dlí iad agus thug sé aghaidh ar ábhair imní i ndáil le rochtain díoltóirí ar *Buy Box* Amazon agus ar a chlár *Prime*. Sheol an Coimisiún Ráiteas Agóidí chuig Apple ina bhfuil réamhthorthaí a léiríonn go bhféadfadh sé gur chuir an chuideachta sin srian ar an iomaíocht chun tairbhe a réitigh íocaíochta féin, Apple Pay. In earnáil na cógaisíochta, díriodh Ráiteas Agóidí chuig Teva inar thángthas ar an réamhchonclúid gur bhain an chuideachta sin mí-úsáid as córas na bpaitinní agus gur chaith sí anuas ar chógais iomaíocha ar bhealach inar tugadh drochíde dóibh.

Maidir le rialú cumasc, ghlac an Coimisiún 368 gcinneadh cumasc agus rinne sé idirghabháil in 18 gcás in 2022. Formheasadh le coinníollacha 12 cheann de na cinntí sin agus cuireadh toirmeasc ar dhá cheann acu (éadail bheartaithe Daewoo Shipbuilding & Marine Engineering CO., Ltd ag Hyundai Heavy Industries Holdings agus éadail GRAIL ag Illuminia). Bhí ceithre idirbheart faoinar tugadh fógra ann ar thréig na páirtithe iad le linn Chéim II.

Maidir le rialú státchabhrach, ghlac an Coimisiún 195 chinneadh faoin gCreat Sealadach Géarchéime um Státchabhair in 2022, agus leis na cinntí sin, formheasadh 182 bheart náisiúnta ar thug na 27 mBallstáit fógra ina leith; thart ar EUR 670 billiún i gcúnamh a bhí i gceist leo. Leanadh den tSaoráid Téarnaimh agus Athléimneachta a chur chun feidhme in 2022: ghlac an Coimisiún cinntí maidir le beagnach 80 beart arna maoiniú ag an tSaoráid Téarnaimh agus Athléimneachta. Ina theannta sin, d'fhorheas an Coimisiún dhá Thionscadal Thábhachtacha ar Mhaithe le Leas na hEorpa i gCoitinne, tionscadail arb é an réimse atá i gceist leo slabhra luacha na teicneolaíochta hidrigine.

Faoi dheireadh, bhí an Coimisiún tiomanta i gcónaí dá áirithiú go leanfaidh ár rialacha de bheith oiriúnach dá bhfeidhm, rud a d'fhéadfá a rá atá níos tábhachtaí ná riamh tráth a bhfuil an saol ag athrú. Chuige sin, lean sé dá athbhreithniú fairsing ar chreat beartais iomaíochta an Aontais in 2022 trí dhul i gcomhairle le páirtithe leasmhara maidir le comhaontuithe cothrománacha idir cuideachtaí, agus trí na rudaí seo a leanas a ghlacadh – na Treoirlínte nua uaidh maidir le Státchabhair le haghaidh na haeráide, chosaint an chomhshaoil agus an fhuinnimh, na Treoirlínte nua uaidh maidir le Státchabhair le haghaidh leathanbhanda, agus na rialacha nua uaidh maidir le comhaontuithe ingearacha.

Is é an sprioc atá ann a bheith chomh hullamh agus is féidir chun dul i ngleic le cibé dúshlán a d'fhéadfadh a bheith romhainn sa 30 bliain amach romhainn.
